

Faaitoitoraa no te tapati tiāfaahouraa (16 no Eperera 1995)

**TAIŌRAA :
MATAIO 28/1-10**

**E haamaitai i te Atua,
e faahanahana i to na
iōā, o ia i faatiāfaahou
mai te pohe mai, i te
Mētia, te Tamaiti fanau-
tahi, te Ora no te mau
nūnaa atoā.**

**TE ORA I TE VAHI
NO TE POHE**

I teie poi-poi no teie nei mahana mātamua no te hepetoma, i faaite ai te Atua i to na mana rahi.

Ua maheu te menema, ua aueue te fenua, ua hurihia te ōfai rahi i te ūputa o te menema, e ua itehia te ora i te anaanaraa i te vāhi no te pohe. Aue te puai no te mana o te Aroha o te Atua, tei faaite e tei faatupu i te ora i te vāhi puhapararaa no te pohe e tei horoā i te tino āpi e te tahuti ōre ia na o tei Tiāfaahou.

**NA ITE MĀTAMUA NO
TE TIĀFAAHOORAA**

E, e mea na roto i te mata e te tiātūriraa o na vahine toopiti nei, o ta Mataio e faahiti ra i roto i ta tātou taiōraa, o ia hoi, o Marfa i Matatara e te tahi atu Maria, to tātou iteraa i teie ōhipa maere e te ōaōa rahi o ta te Aroha o te Atua i rave e i faatupu i teie poi-poi no teie nei mahana mātamua no te hepetoma.

Te vāhi faufaa toā o teie nei nau vahine, o te mea ia e, o raua atoā o tei ite ia lotefa Arimataio i to na tuu-
raa i te tino pohe no letu i roto i te menema (Mataio 27/57-61). Ua riro raua ei ite no te hunaraahia te tino no te Fatu i te ahiahi a pohe ai oia ra, e inaha i teie poi-poi

roa te riro nei ā raua ei na ite mātamua roa no te tiāfaahouraa no to tātou Fatu e to tātou Faaora o letu Metia.

E parau mau, aita o Maria mā i ite e caha mau na te ōhipa i tupu i roto i te menema. E ia au i te faatiāraa a te mau Evāneria, aita roa atu te hoē taata i ite i te reira. Eita e ōre e, e te faaite maira te reira ia tātou e, e te ōhipa o tei ravehia e te mana no te Aroha o te Atua e mea hohonu ia, e o te ōre roa e taeāhia e te ite e te maramarama o te taata. E e na roto anaē i tona tiātūriraa e to na faaroo e ite ai te taata e e ite atoā ai tātou e te hui faaroo i te ōhipa rahi o tei ravehia e te Atua i teie poi-poi no teie nei mahana mātamua no te hepetoma.

**TE NATURA TEI RIRO
ATOĀ EI ITE NO TEI
TIĀFAAHOU**

I te ōmuaraa no ta tātou taiōraa no teie mahana, a taa noa atu ai te parau no te tere o Maria mā i te menema, te ite atoā nei tātou i te tahi mau ōhipa maere e tupu ra. Te āueuerāa o te fenua e te vai atura mai tei itehia i te taime a pohe ai te Fatu i niā i te raau tarava no Toratota (Mataio 27/51).

Ei tapaō faaite ia tātou e, e mai te mea, e ua āmui te natura i roto i te peāpeā, te ōto, te mauui e te pohe no te Fatu i niā i te raau tarava i taua ahiahi ra, te amui atoā nei ia i teie poi-poi i roto i te ōaōa no te tiāfaahouraa no letu Metia, te Faaora o teie nei ao.

E ua riro te Merahi o tei pou mai mai te rai mai, ei faaiteraa i te rahi e te ānaāna no te ōaōa o te natura i teie poi-poi, e aita roa te hoē ōhipa e mau i mua i te reira,

te ōfai i mua i te menema ua huri ē hia ia.

E i roto i te Faufaa Tahito, ua riro ia te āueuerāa fenua ei tapaō faaiteraa i te mau ōhipa mana e tei ravehia e te Atua.

**TE MERAHI, NO TE
FAAITE IA I TE ORA**

E mai ta tātou i ite, i te ōmuaraa no teie nei Evāneria na Mataio (1/20), na te Merahi i faahei taōto ia lotefa no te faaite ia na i te Parau Apī ōaōa no te fanau-
raa no te Mētia te ora o teie nei ao. E inaha, i ō nei i mua i te menema, te tiā mai nei ā te Merahi a te Atua, no te faaite ia Maria mā e ua tiāfaahou te Mētia, aita faahou o ia i roto i te menema. E mai te mea ra, te ite atoā ra te Merahi e, ua ite teie na vahine i te vāhi i tuuhia ai te tino o te Fatu, i parau ai o ia ia raua e : «a haere mai na a hiō i te vāhi ...». Ua riro atoā teie reo no te Merahi, ei titauroa i teie nau vahine, eiaha no te hiō i te Fatu ia tiā mai mai roto mai i te menema, no te hiō rā e no te haapāpu atoā e ua tiā mau te Fatu mai te pohe mai, e ua faaruē mau oia i te menema, te vāhi no te pohe. E te mea o ta raua i faaroo mai roto mai i te vaha no te Merahi e te ōhipa o ta raua i ite i roto i te menema, ua faatupu ia i roto ia raua i te hoē ōhipa taaē e te maere rahi o ta Mataio e faahiti ra i te irava 8. Te mataū e te ōaōa, ua ānoi noa ia e ua tupu āpipiti noa i roto i to raua aau. Auē ia ōhipa i te huru ē e te maere rahi. E na roto i to te Merahi pouraa mai i teie nei poi-poi i te menema, te ite atoā nei tātou i te huru no te mau tiai o tei tonohia mai e te mau Tahuā Rarahi e te mau Faritea, na roto i te faatiāraa

a Pirato, no te tiai i te menema. Ua i roa ratou i te mataū e ua riro mai te taata pohe ra te huru. O te huru mau teie, e hoa here mā, no te taata o tei ore i tuu i tona tiātūriraa i roto i te Atua, te Tumu hoē roa no te ora. E o to tātou atoā ia huru, e hoa here mā, ia ōre tātou ia farii e ua tiāfaahou te Fatu mai te pohe mai, e ia ōre hoi tātou ia tuu i to tātou tiātūriraa i roto i tona tiāfaahouraa e oia anaē o te faaāpi i te mau mea atoā.

O Maria mā, o raua o tei tāpapa mai i te menema i teie poi-poi roa, o raua na ite mātamua roa no te ōhipa maere rahi o ta te mana e te puai no te Aroha o te Atua i faatupu, ua farii raua i teie parau āpi ōaōa no te tiāfaahouraa no te Metia e ua tuu raua i to raua tiātūriraa taa-
toā i roto i to na Tiāfaahouraa. I peepee ai raua i te haere e faaite i te mau pīpī i taua parau āpi ra ia au mai ta te Merahi i parau atu ia raua. E inaha, tei niā raua i te eātiā, te haere mai nei letu e farerei ia raua, e aroha maira raua na ō maira : «la ora na».

E hoa here mā, e taime faufaa rahi teie, i roto i te parau no te farereiraa e te iteraa ia letu i muri aē i to na tiāfaahouraa. O teie nau puē vahine o tei ite mata-
mua roa i te huru no te Fatu, i muri aē i na rui e toru no to na parahiraa i roto i te menema. E hau roa atu te faufaaraa no teie nei farereiraa no raua i te Fatu o tei tiāfaahou, i te mea ia e, o te Fatu iho o tei haere mai e farerei ia raua i niā i te eātiā. Auē ia parau i te ōaōa e. Ei faaiteraa te reira ia tātou e te mau Maru Metia e, i te taime tātou e tuu ai i to tātou tiātūriraa taatoā i roto i tona Tiāfaahouraa, o te

taime atoā ia e haere mai ai te Fatu i rotopū ia tātou.

E na roto i ta na tonoraa ia Maria mā, no te haere e faaite i ta na mau pipi e haere i Tarirea ei reira ratou e ite ai e e farerei ai ia na, te hinaaro atoā nei te Fatu e tono atoā ia tātou, i teie nei mahana : tātou tei fai e o letu Metia to tātou Fatu e to tātou Faaora ; i te feiā atoā o tei ōre e tiāturi faahou ia na, tae noa atu i te feiā o tei ōre i ite ia na. Te faarooaraa ia na, o te fariiraa atoā ia i ta na tonoraa ia au mai ta na i tono i ta na mau pipi i te pae hopeā no teie nei pene parau (irava 19-20) i te na ōraa e : «E haere outou e faariro i te mau fenua atoā ei pipi na ū, ma te pāpētito atu ia rātou i te iōā no te Mētua, no te Tamaiti, e no te Varua Maitai, e ma te haapii atu ia rātou i te mau parau atoā o ta ū i faaite atu ia outou na. E inaha, tei pihai atoā iho vau ia outou e tae noa atu i te hopeā o teie nei ao ».

No reira, e hoa here mā, te ite ra tātou, i roto i ta tātou taiōraa no teie mahana, i teie nei tonoraa na te Fatu i te feiā atoā o tei faaroo ia na. E ōre roa ai e tiā ia tātou ia tapeā noa i teie nei parau no te Tiāfaahouraa no tātou anaē, ua titauroa rā tātou ia faaite e ia poro i te reira i te mau taata atoā. Ua ineine ra anei hoi tātou taitaitahi. I te mea hoi e, e titauroa e e tonoraa atoā teie i te taata taitaitahi, ia haere na te mau vāhi atoā no te haapii e te poro i te Parau Apī ōaōa no te Evāneria a te Fatu.

Na tātou te reira e rohi, e na tātou atoā e faaitoito, ia hanahana te iōa o te Fatu o tei Tiāfaahou. Ia ora na.

THIERRY TAPU ŌROMETUA

Te oroā iupiri 1997

E aha te mau Tāpura ōhipa i ferurihia mai e te Tomite Iupiri i te mau taime i mairi ?

Te mau Tumu parau tei roto noa ā i te tuatāpapa-
raa :

1) Ia tuatāpapa-faahou-
hia te oraraa o ta tātou Etārētia. E aha ta na e hiaai nel e aore rā e hinaaro nei, te pī nei tātou i te aha ? E horoā tātou i teie tāpura ōhipa i roto i te hoē taata aravehi i te tuatāpapa-
raa «sociologue», e i muri aē e hiō ai te Etārētia i ta na

poroira. Ia riro hoi ei irava auro no teie Oroā Iupiri.

2) Te pāpairaa i te tahi Puta no te Iupiri e ia tuuhia i roto i teie puta te parau e te mau hohoā o te mau haapii evāneria māōhi mata-
mua e tae noa atu i te mau ōrometua atoā i tāvini mai na e o te tāvini nei ā i ta tātou Etārētia.

3) Ia tuatāpapahia te parau no te faahoi-faahou-
raa mai i te mau Etārētia, mai roto atu nei ia tātou nei te tupuraa atu taua mau Etārētia ra.

Ua haapaōhia mai na rā taua tāpura ōhipa ra i mua ra o tei mau no te hoē mau tumu i itehia... E tiā rā ia feruri-faahou-hia te parau no te haafatata-faahou-
raa...

4) Te haamauraa i te hoē Tomite a te mau Etārētia, noa atu te ohie-ore o te mau tūātira e te tahi atu mau Etārētia.

No teie rā taime, o te tūā-
tiraa noa ia i rotopū ia tātou e te Etārētia Tatorita, teie e vai nei...

5) Hohoā no te taeraa mai

o te mau mitionare mata-
mua, ia hamanihia ia te tahi mau «cartes postales» e, a taā noa atu ai te reira, ia faataā-atoā-hia te tahi atu mau hohoā no te mau titiro mahana mātamua, tārena, pareu, «dépliants»...

6) Faataāraa i te tahi vahii vairaa no te ofai-tāpao o Notii.

7) Ia anihia te Faatereraa Oire e aore ia te Faatereraa Hau Fenua ānei, ia faatiā mai i te mau aniraa toparaa iōā no te tahi aroā ānei aore rā vahii ānei i Papeete nei e i

roto i te tahi atu mau motu.

8) Te tuatāpapa atoā nei te Tomite Iupiri i te parau no te faanahoraa i te tahi puta iti «quotidien», e 4 aē āpi. Tei roto teie tāpura ōhipa i te rima o to tātou hoa o Gilles MARSAUICHE. Teie puta iti, te taime ia o te A.R.A a te P.C.C e ōperehia ai.

Faaitoito à tous et à toutes...

NO TE TOMITE IUPIRI 1997
DANOU HEUEA